



ՀԱՅՈՑ ԱՌԱՋՆՈՐԴՈՒԹՅՈՒՆ ՖՐԱՆՍԱՅԻ

Գերաշնորհ Տ. Վահան Եպս Յովհաննէսեան Առաջնորդ

DIOCÈSE DE FRANCE DE L'ÉGLISE APOSTOLIQUE ARMÉNIENNE Son

Excellence Monseigneur Vahan Hovhanessian, Primat de France

«Յարուցելոյն ի մեռելոց
ալելուիա, որ զաշխարհս
լուսաւորեաց, ալելուիա:»

(Սուրբ Յարութեան
Շարական)

Սիրելի Հաւատացեալ Ժողովուրդ Ֆրանսայի

Այսօր Հայաստանեայց Առաքելական Եկեղեցին եւ Հայ ժողովուրդը կը միանան Քրիստոնէայ աշխարհին հետ նշելու համար Քրիստոսի մեռելներէն հրաշափայլ յարութեան տօնը: Այսօր Քրիստոս իր յարութեամբ վերանորոգեց աշխարհը եւ ստեղծագործութիւնը յաւիտենական կեանքի յոյս պարգեւելով: Մարդկութիւնը Քրիստոսէն առաջ շղթայակապուած էր մեղքի եւ անոր հետեւանքով՝ մահուան: Անհրաժեշտ էր փրկիչ մը՝ մեկը որ պիտի վճարէր փրկագինը մեր մեղքերուն՝ անցյալի, ներկայի եւ ապագայի: Խաչի վրայ Իր կամաւոր մահուամբ՝ Յիսուս դարձաւ այդ փրկագինը մեր մեղքերու համար, եւ մեռելներէն յարութիւն առնելով՝ ան միանգամ ընդ միշտ ջնչեց մեղքի կապանքները եւ կործանեց մահուան վճիռը:

Այս է մեր հաւատքի ուրախ լուրը: Աստուած այնքան սիրեց մեզ, որ Ան ինքզինքը ինքնակամ զոհ մատոյց՝ մեզ յաւիտենական կեանք պարգեւելու համար: Ինչպէս եկեղեցւոյ հայրերը կ'ըսեն՝ յաւիտենական Աստուած ընտրեց մեռնիլ, որպէսզի մահկանացու մարդը յաւիտենական կեանք ապրելու հնարաւորութիւնը ունենայ: Այս Աստուածային պարգեւ մըն է որ Աստուած կը բաշխէ բոլոր անոնց որ կը հաւատան մեր Տիրոջ եւ Փրկչին Յիսուսի Քրիստոսին:

Մենք ազգի մը որդիներն ենք, որ ընտրած է հետեւիլ Քրիստոսին եւ հաւատարիմ մնալ Անոր աւետարանին՝ զաւակները աշխարհի առաջին քրիստոնէայ թագաւորութեան: Թէպէտ մեր պատմութեան էջերը լեցուն են օտար ազգերու ներխուժումներով եւ մեծ կայսրութիւններու վայրագութիւններով, մենք միշտ մեր հաւատքով ի Քրիստոս յաջողած ենք ոտքի կենալ, վերականգնիլ եւ շարունակել ապրիլ: Ավարայրի ճակատամարտէն սկսեալ անցնելով 1915-ի ցեղասպանութիւնէն, Սումկայիդէն եւ այլք, իւրաքանչիւր սարսափելի իրադարձութիւն կարելի է ազգային խաչելութիւն սեպել մեզ համար: Սակայն, այսուհանդերձ, յարուցեալ Քրիստոսին ապաւինելով մեր ժողովուրդը իր հաւատքով յաջողեցաւ յարութեան յաղթանակի եւ պայծառ ապագայի վերածել իւրաքանչիւր ազգային պատմական խաչելութեան դէպք, եւ շարունակել ապրիլ մինչև այսօր: Ու՞ր են այսօր անցեալի մեծ պետութիւններն ու բանակները: Անոնք բոլորն ալ անհետացած եւ ոչնչացած են, սակայն մեր

սիրելի Հայաստանն ու հայ ժողովուրդը կը շարունակեն գոյատևել: Փառք Աստուծոյ, այսօր մենք ունինք բարգաւաճ Հայաստան, իր Հայրապետութիւնով եւ հանրապետութիւնով որ կը դեկավարուի մեր ժողովրդի իսկ որդիներով և դուստրերով:

Այս բառերը գրելուս ժամանակ, միտքս զիս կը տանի իմ քահանայական ծառայութեան անցեալ երեսուն տարիներու ընթացքին տարբեր եկեղեցիներու մէջ ուր տօնած ենք Սուրբ Զատկական Պատարագը. հարիւրաւոր հայորդիներ կը լեցնէին եկեղեցիները և ուրիշներ ալ դուրս կը սպասէին, եկեղեցիներու սահմանափակ տարածութեան պատճառով: Այս տարի, սակայն, համաճարակի ներկա իրավիճակի պատճառով մենք Յարութեան տօնը կը նշենք մեկուսացուած իրարմէ: Մինչ մեր տուններուն մէջ մեկուսացած ըլլալով՝ բաժանուած ենք մեր սիրելիներէն և ընկերներէն, ես կը հաւատամ որ մենք միացած կը մնանք հոգիով եւ սրտով ամրապնդուած Քրիստոսի խօսքերով և իրարու հանդէպ քրիստոնեական սիրով: Մեր հաւատքի կապը կը գերազանցէ աշխարհագրական սահմանումները, եւ մեզ հոգևորապէս կը միացնէ այս օրհնեալ տօնին: Իսկապէս այսօր, աւելի քան երբեք, որքան մխիթարական եւ ներշնչիչ կը հնչէ մեր աւանդական ողջոյնը Քրիստոսի փառաւոր հարութեան տօնի առիթով. «Քրիստոս յարեալ ի մեռելոց:»

Թող Տիրոջ յարութեան լոյսը ներթափանցէ տիեզերքը եւ իւրաքանչիւրիս սիրտն ու հոգին, մաքրելով չարիքներէն ու մեղքէն: Թող թափուր գերեզմանի ուրախ լուրը յոյսով եւ մխիթարութեամբ լեցնէ մեր սրտերը, բժշկելով եւ զօրացնելով անոնց որոնք կարիքն ունին բժշկութեան եւ ցաւի փարատման: Թող Յարուցեալ Քրիստոսը պահէ եւ պահպանէ մեզ, մեր սիրելիները, մեր երկիրը, մեր հայրենիքը՝ Հայաստանը իր հանրապետութեամբ և հայրապետութեամբ և պաշտպանէ մեզ բոլորիս: Թող Անոր հրաշագործ ձեռքը դպչի այս երկրագունտին և բուժէ բոլորիս աշխարհը պարուրած համաճարակէն և մեզ արժանացնէ վերադառնալու մեր սիրելիներուն և մեր եկեղեցիներուն, որպէսզի շարունակենք փառաբանել Քրիստոսը՝ Հօր և Սուրբ Հոգիին հետ միասին, այժմ և միշտ և յաւիտեանս յաւիտենից : Ամէն:

«Քրիստոս Յարեալ Ի Մեռելոց: Օրհնեալ է Յարութիւնն Քրիստոսի:»

Օրհնութեամբ եւ սիրոյ ողջունիւ ի Քրիստոս՝

+ *Վահան Եպս.*

Վահան Եպս. Յովհաննէսեան, Առաջնորդ